



Sabtu, 27 Mei 2023
Ogen: Johanes 20:18



Enggo Jumpa Ras Tuhan



Maria Magdalena e me si pemenana seh ku kuburen Tuhan Jesus. I bas erpagi-pagi si lampas, ia nggo seh i bas ingan Tuhan Jesus si nggo mate ndube. Tapi sada si nenggeti ia maka kuburen e kepeken nggo talang. Sada lubang mbelin si nutupi kuburen e nggo geling. Kula Jesus ndai lanai i je. La iarapna, maka kai sinikataken Jesus tupung nggeluh enggo jadi. Saja kebiaren si ngkuasai ia bas paksa e erbahanca perukuren sideban turah, iakapna maka kula Jesus e nggo itangko kalak. Perban si e aru atena, ngandung ia. Ban aruna atena piahna tedis pe Tuhan Jesus ndai la nari itandaina. Tapi kenca iturihi Tuhan ukurna, erlayas ukurna, ipernehenna Jesus, emaka ngulahi ia sedar. Tuhan Jesus si idaramina labo tangko kalak, tapi keke bas si mate nari. Perjumpanna ras Tuhan Jesus si keke ndai ngubahken perukurena, si ndai ikuasai ate megogo ras aru, jadi meriah ukur.

Genduari mbue jelma ipeturutna bana ikuasai perukurena secara manusia. Kebiaren si kitik iasuhi, ipebelin-belin piahna jadi pinakit. Kitab Job ngatakenca *kai si kukebiarken e jadi man bangku*. Kubur Jesus banci jadi gambaren kehadiran Tuhan bas pusuhta. I je nge Tuhan Jesus e, tapi ban situtup pusuhta, la IA si idah. Enggo pe ibuka Tuhan dalam nandai IA, aru denga ka ateta, uga nge wari si pepagi ninta, emaka ngerana pe Ia la terbegi cuping ras pertendinta. Cubaken pernehen Tuhan Jesus e, arah paksa tenengta. Gejabken kerehenNa bas penembahenta ras dengkehken kataNa ngerana me IA, petandakenNa diriNA. Maka si idah diriNa. Perjumpanta ras Tuhan terjadi bas pusuhta, adi nggo kita jumpa ras Tuhan e pasti ipelimbaruina geluhta. Emaka meriah si akap meritaken kiniulinNa, gelahna kerina nggejabken kiniulinna e.



Blank writing area with a light blue background and a wavy top edge.